

02/04/2024

Aizawl

1830 Hrs

REGIONAL NEWS

HEADLINES:-

1. Disaster Management Minister Pu K. Sapdanga chuan tun hnai a thli, ruah leh rial tla-in chhiatna a thlen tuartute chu theihtawpa tanpui an nih tur thu a sawi.
2. Tunhnaia Mizo hmeichhe pakhat chu hmeichhe zahawmna tibawrhbang thei tura social media kaltlanga video leh thlalak a tarlan fo avangin thubuai siam sak a ni.
3. Arunachal Pradesh-a hmun hming thenkhat China-in a thlak fo chu sawrkar laipui chuan na takin a dem.
4. Election Commission chuan Lok Sabha leh Assembly inthlan lo awm turah state parukah uluk zawka vil turin Special Observer a ruat.

<><><>

THUNDERSTORM-MINISTER

Disaster Management Minister Pu K. Sapdanga chuan tun hnai a thli, ruah leh rial tla-in chhiatna a thlen tuartute chu theihtawpa tanpui an nih tur thu a sawi.

Vawiina social media laka a thupuanah Pu K. Sapdanga chuan Chief minister Pu Lalduhoma pawhin khuarel chhiatna thil a nih avangin Election Commission of India (ECI) hnenah harsatna hi a thlen nghal niin a sawi a. Khuarel chhiatna a nih miau avangin inthlan puan hnu election model code of conduct huam lai ni mah se a theih ang angin tanpui ngaite puih an ni tih sawiin, MLA te chu anmahni bialah an theih ang angin an feh chhuak tih a sawi bawk a. Chhiatna thilah hi chuan election thuneitu lam pawhin an hrethiam niin a sawi bawk a ni.

Minister chuan Mizoram chhunga chhiatna hrang hrang a thlen chu pawi a tih thu a sawi a. Social media-ah video dah chhuakin, state disaster relief fund a awm tih sawiin, vanduaina tawk zawng zawngte a tawrhpui tih a sawi a, sorkarin a tih tur leh tih theih chin, danin a phal ang chin tih a nih tur thu a sawi bawk.

Pathianni zing leh nimin zinga to haw leh rial tam tham tlak avangin Mizoramah chhiatna hrang hrang a thleng a, hriat theih chinah in 1,000 chuang a chhia a ni.

A bik takin nimin tuka rial tla avang khan Kolasib District-in an tuar nasa ber a, he district huam chhunga khua leh veng 9-ah mihring chenna In leh mihring chenna nilo, sorkar building leh Biak In 744 a tichhia a. In chhiate hi a tam zawk chu rial-in a chung chauh a tihchhiat te niin, thli a tel avanga Lungdai-ah chenna in pakhat chu a vaiin a chhe vek a ni. Kolasib district bawrhsap pisa-a District Disaster Management & Rehabilitation, Kolasib-in an chhinchhiah danin, thli leh rial thawk avanga harsatna tawk khua te hi hriat theih chinah Lungdai, Serkhan, Buhchangphai, Bilkhawthlir North leh South, N Chawnpui, N Chhimluang, Saipha leh Saipum te an ni a; Bilkhawthlir South-ah hian Chenna In chhia tam berin, report-a a lan dan chuan Rial vanga In chung chhia hi chenna In 216 a awm a; Anganwadi Centre pahnih, PHC Quarters 7, Police Quarters 3, UPS

building leh Primary School building pakhat ve ve te a chhia a. Bilkhawthlir North-ah chenna In chhia 185 awmin a tam ber dawttu a ni.

Chenna In chhe vek hi Lungdai-ah pakhat awmin, report-a tarlan a nih dan chuan thli leh rial thawk avanga chhia a ni a; hmun dangah erawh luahzui theih loh khawpa chhia chenna In a awm lo niin an tarlang. Rial-in a tihchhiat chenna In 744 zinga a tam zawk 539 te hi In chung thenkhat lai/a zahve aia tlem chhia (partial damage) a ni a; chenna In 154 te chu a zahve aia tam chhia (Severly damage) an ni. Chenna In ni lo chhe zingah hian Lungdai-a Aganwadi Centre pakhat leh Coffee Board Quarters te chu rial hian a chung a deng chhia a, Serkhan-ah pawh English Medium School pakhat leh Anganwadi centre pakhat te chu a chung a deng chhe bawk. N. Chawnpui-ah Salvation Army Biak In leh UPC Mizoram Biak In te a chhia a; N. Chhimluangah Presbyterian Kohhran Biak In, Salvation Army SS Hall, Anganwadi Centre pakhat, Primary School leh Middle School pakhat ve ve bakah Self Help Group office chung te a chhe bawk.

Champhai district ah pawh in 134 zet a tichhia a. In 5 luah tlak lohvin a chhia a, In 129 chu a then a zar a chhia a chung zingah chuan Middle sikul 1, High School 1, Higher Secondary School 1, PES 1, Supply Kudam 1, Myanmar ralatlante dahna buk 7 leh Districe Jail 1 te an ni. Tun thlenga hriat theih chinah Champhai District a khua leh veng 23 a mihring 690 ten an tuar a, chung tawrhna khua leh Veng te chu- Zawngtetui, Sazep, Khuangleng, Hruaikawn, New Hruaikawn, Vangchhia, Vanzau, Bungzung, Khawbung, Zawlsei, Vaphai, Farkawn, Vaikhawtlang, Khuangphah, Hnahan, Tlangsam, Sesih Zokhawthar te bakah Champhai khaw chhunga- Dinthar, Vengsang, Vengthlang, Jail Veng te an ni a. Report hi a la lut reng bawk a ni.

Mamit district-ah chuan nimin tuka rial tla khan in 55 a tichhia a. A hma ni a thlipui tleh khan in 52 a ti chhe bawk. Khawzawl district-ah chuan nimin leh Pathianni a thli tleh leh rial tla avangin in 77 a chhia report dawn a ni tawh a ni.

<><><>

POLL-POSTAL BALLOTS

Lok Sabha inthlan lo awm tura Mizoram Parliamentary bial atan venhimna lama hnathawktu service voter 4,963 te hnenah e-postal ballot (Electronically Transmitted Postal Ballot) thawnchhuah a ni.

Heng Postal Ballot hi service voter-te awmna hmuna print chhuah a ni ang a, vote an thlak fel hunah Returning Officer hnenah an thawn dawn a ni. Service voters hi mipa 4,872 leh hmeichhia 91 an awm a ni. Hetih lai hian inthlan vote thlak ni a hna pawimawh thawk tur Aizawl amite tan Postal Ballot Voting Centre chu DC Office (Nazarat Branch) ah ruahman a ni a. Kar leh Thawtanni atangin Nilaini thleng dar chawhma dar 9 leh tlai 5 inkar chhungan hawn a ni ang.

<><><>

CASE FILED

Tunhnaia Mizo hmeichhe pakhat chu hmeichhe zahawmna tibawrhhbang thei tura social media kaltlanga video leh thlalak a tarlan fo avangin thubuai siam sak a ni.

Mizoram State Commission for Women Chairperson Pi Lalchhandami chuan tunlaiah Mizo hmeichhe thenkhatte'n hmeichhe zahawmna tibawrhhbang thei turin social media kaltlangin video leh thalak an tarlang ta fo mai a. A lo

thlirtute ngaihtuahna hruai sual thei tur angin mipat hmeichhiatna mai bakah dan phal loh zu te nena chettlatna niawm tak te pawh ual-au takin hmuh theihin a awm a ni a ti a. Hetianga social media kaltlanga intarlanna te leh a kaihhnawih mipat hmeichhiatna hawi zawnga video hmuh tur awm fo chu Mizoram State Commission for Women chuan a ngai thu tak hle a ti a, tunhnaia thil thlengah pawh 'suo moto'-in thubuai siam niin, chak taka hma laks mek a ni a ti.

Pi Lalchhandami chuan social media kaltlanga mipat hmeichhiatna hawi zawnga mawi lo taka chetna chungchangah Women Commission chuan 'suo moto' in Mizo hmeichhe thenkhatte thubuai a lo siamsak tawh thin a ti a. Taninah hial pawh dah luh an lo awm tawh thin tih a ni a ti a. State Commission for Women Chairperson chuan che mawi lo an awm palh changa social media khawih thin leh Youtuber thenkhat ten boruak sosang zawnga thil an vawrh darh zel mai chu pawi a ti hle tih sawiin mipat hmeichhiatna rawngkai thalak vawrh darh chu dan anga hrem theih a ni tih mipuiten hria se a duh a ti a, Mawi lo taka che thin te leh dan bawhchhetute lakah Mizo hmeichhiate zahawmna vawnhim zel na'n Women Commission chuan chak takin hma a la zel dawn tih sawiin thubuai lian zawk pumpelh anih theih nan mi tinte fimkhur turin a chah bawk.

<><><>

DRUGS

Excise and Narcotics department hnathawkte chuan kumin January atanga March thla inkar chhung khan heroin kg 18 leh gram 570 an man tling tawh. An department thupuangtu Pu Peter Zohmingthanga hnen atanga thu dawn danin heroin bakah hemi hun chhing vek hian Methamphetamine Kg 106 leh gram 648 an man tawh bawk a. Ganja Kg 381 leh gram 76 an man tawh bawk. Hetihlai hian nimin tlai dar 4 khan Chaltlang Lily Veng (State Guest House bul)-ah Heroin gram 11 leh a neitu nia puh mi pakhat - Lalmuankima (32) Durtlang Leitan-a khawsa ni a inchhal chu an man a. He thil chhui zelnaah nizan dar 11:55 khan Hunthar Vengah he thubuaia inhnamhnawih dang mi 3 - KC. Thangmawii (44) Zokhawthar, Champhai District; Lalthanpari (54), Falam, Myanmar (tuna Hunthar Veng, Aizawl-a khawsa mek) leh Tluangthanpari (39) Falam, Myanmar (tuna Bawngkawn Brigade-a khawsa mek) nia inchhalte an man a. An ni hnen atang hian Heroin gram 109 leh Methamphetamine Kg 5 leh Gram 888 (mum 60,000) an man bawk. Heroin leh Mathamphetamine vanga mante hi The Narcotic Drugs & Psychotropic Substances Act, 1985 tlawhchhanin thubuai siamsak a ni a. Vawiin khan Special Court (ND&PS Act)-ah hruai nghal an ni.

<><><>

AIZAWL SP

Aizawl SP Rahul Alwal chuan ruihhlo do chu a ngaih pawimawh hmasak a ni a ti a, police chu man hnathawktu ni mahse a ɻhatlohzia thehdarh kawngah NASA taka ɻan lak a ngai tih a sawi.

He thu hi vawiina Aizawl SP Conference Hall-a chanchinbumite a kawmna-ah he thu hi sawiin Aizawl SP Rahul Alwal chuan chhungkua leh khawtlang ah ruihhlo a ɻhatlohzia chu inzirtir uar thar a ngai a ti a, hemi kawngah hian tlawmngai pawl leh pawl hrang hrang te thawhpui a tum dawn tih sawiin police chuan a man hna thawk mahse a ɻhatlohzia thehdarh kawngah NASA zawkin ɻan an la dawn a ti. Aizawl SP chuan suahsualna kawng hrang hrang do turin theihtawp chhuah ani dawn a ti a, rukruk te leh tualthahna ang chi sualna te chu a chhui tur bik Team ruat an ni dawn tih sawiin mipuite pawhin CEIR application

hmangin awlsam takin mipuite pawhin phone bo leh thildang bo te an report thei dawn tih a sawi.

Aizawl SP chuan naupang kumtlinglo thubuai chungchang leh a dan POCSO bakah cyber crime chungchang te chu mipuite inzirtir that a pawimawh a ti a, hursualna kawngah mipuite chuan an hriat tur ang pawimawh hrilhhriat an nih theih nan tan lak a ngai tih a sawi bawk.

Aizawl SP chuan kumina Lok Sabha inthlan lo awm turah inthlanna muanawm leh felfai a awm theih na'n police te'n theihtawp an chhuah niin a sawi a, district chhungah uluk taka venhimna kalpui a ni a ti bawk.

<><><>

REFUGEES

Lunglei District bawrhsap Pi Ramdinliani chuan tunhnaia Paletwa township, Chin state atanga Khumi raltn mi 85 ten Lunglei district chhunga thinglang khaw pakhat-ah an rawn luh belh chungchangah a hmunah thil awmdan enfiah turin nimin khan Khawmawi khua a tlawh.

Bawrhsap hi SP, Addl. DC leh YMA Sub Headquarters hruaitu ten tawiauamin, Khawmawi VC leh YMA branch hruaituten an lo dawngsawng a ni. Raltn lo lut tharte kawmin, Bawrhsap chuan Raltnante chu ram dang mi an ni angin India khua leh tuiten chanvo an nei ang an nei ve thei lo tih a hrilh a. Sorkar, VC leh YMA ten inkaihruaihna an duan te tha taka zawm turin a chah a. India sawrkarin Myanmar atanga rawn raltnante refugee angin pawm loh mahse Mizoram sawrkarin mahni mihringpuite hmangaihna rilru (humanitarian ground) avang chauhin Myanmar raltnante a lo tuamhlawm thu tarlangin, raltnante chu India sawrkar dan leh hrai te zawm turin a hrilh a. Ruihlo tawl leh sualna dangah inhnamhnawih lo turin a a chah hlawm bawk. DC hian raltnante chu a bika ruahman camp-ah an awm tur a ni a, VC te hriatpuina tel loin an duh duhin an zin kual in, an pem kual tur a ni lo, a ti bawk.

Raltnante nen an inkawm zagh hnuah DC hian raltn lo lut tharte awmna tur in sakna tur hmunhma a enfiah nghal a, VC hnenah raltn lo lut tharte chenna in sakna tur silpouline bundle khat pein, tui lakna tur pipe pawh a rang lama ngaihtuahsak an ni tur thu VC te a hrilh bawk.

Pi Ramdinliani hian Lok Sabha inthlan atana hman tur Polling Station (Khawmawi Primary School) chu tlawh nghalin, school thuneitute chu Composite grant an dawn atanga toilet siam that tur chu a rang lama zo fel turin a chah hlawm bawk.

<><><>

ARUNACHAL PRADESH

Arunachal Pradesh-a hmun hming thenkhat China-in a tlak fo chu sawrkar laipui chuan na takin a dem.

External Affairs Minsitry thupuangtu Randhir Jaiswam chuan hetianga hming tlak mahse Arunachal Pradesh chu India ram bung pawimawh leh lak hran theih loh a la ni chhunzawm zel a ti. China-in India ti thinrim zawnga hmun hming tunhnaia a tlak avangin sawrkar chuan a chhanglet nghal a.

External Affairs Minister Dr. S. Jaishankar-a pawhin nimin khan China hi a dem thu sawiin hming tlak hian nghawng engmah a nei dawn lo a ti a. Arunachal Pradesh chu hman atanga vawiin tlengin India state a ni reng dawn a ni a ti.

<><><>

ELECTION COMMISSION

Election Commission chuan Lok Sabha leh Assembly inthlan lo awm turah state parukah uluk zawka vil turin Special Observer a ruat. Heng statete mihring vaibelchhe sarih chuang awmna West Bengal, Uttar Pradesh, Maharashtra leh Bihar bakah assembly inthlan neih telna tur Andhra Pradesh leh Odisha te an ni a.

Special obersever te hian inthlanna thawktu hrang hrangte, security force te leh vote thlakna hmanrua vil hna an thawk dawn a ni.

<><><>

RUSSIA

Russia khawchhak kil Amur region-a rangkachak khur chima tang mi 13 te chu thi a puan an ni. Pioneer gold mine chima tangte hi chhanchhuah hna ngawrh taka kar hnih chhung thawh anih hnuah tihtawp a ni a. Russia leh China inrina laia rangkachak khur chimah hian meter 120 a thuk khura hnathawk mi 13 te hi leiin a chhilh a. Khur hi chim leh mai thei hlauhthawnawma a awm avangin chhanchhuah hna pawh hi tihtawp a ni a. Chhanchhuah hna tihtawp anih hnu hian rangkachak khura luh pawh khap nghal a ni a. Hmun danga chim belh thei vengin mithiamten hna an thawk mek a ni.

<><><>